

Utskrift av sak 7 i møte i Alver idrettsråd 17.mars 2021

Sak 7: NY HØYRING OM KULTURPRISAR I ALVER KOMMUNE

Idrettsrådet syner til oversendt sak: Oppretting av prisar til kultur, idrett og frivilligheit i Alver kommune – NY BEHANDLING – dagsett 22.01.2021.

Av saksførelegget går det fram at saka var til handsaming i **Utval for oppvekst, kunnskap og kultur (OKK-064/20)**, og det vart gjort slikt Vedtak:

Utval for Oppvekst, kunnskap og kultur utset saka, og ber administrasjonen om tilleggsutgreiing på om ein av prisane bør vera uttrykk for Alversamfunnet si høgaste utmerking. Dersom det er kulturprisen som skal vera den høgaste utmerkinga, så må innhaldet i kultur- og frivilligprisen også vurderast.

Idrettsrådet sin uttale i den førre høyringa var fylgjande:

Alver idrettsråd vil uttala fylgjande:

- Alver idrettsråd tilrår utdeling av 3 prisar
- Personar som bur utanfor kommunen, men yter frivillig innsats i kommunen, må kunna få ein pris
- Idrettsprestasjonar og/eller frivillig arbeid innan idretten må og kunna vurderast som kriterium ved utdeling av kulturprisen

Kulturlivet i Alver har rike tradisjonar gjennom mange år. Arven frå dei tre kommunane Lindås, Meland og Radøy er særskild viktig å føra vidare og mange både innanfor og utanfor det utvida kulturomgrepet gjer ein ubetaleleg innsats for at dette skal gjera heile Alver til ein god stad å leva og bu. Idrettsrådet er såleis svært glad for at Alver kommune legg opp til årleg utdeling av prisar innan kultur og frivillig arbeid.

Alver idrettsråd har ei klår avgrensing innan kulturfeltet», der målet er å «fremja felles mål om idrett, fysisk aktivitet og folkehelse for alle i Alver». Det er 40 idrettslag i kommunen, med om lag 70 ulike aktivitetar og 9500 medlemmer, og den frivillige innsatsen er berekna til å utgjera mellom 80 og 90 millionar kroner pr år.

Vidare har me alle andre aktivitetar både innanfor og utanfor det «utvida kulturomgrepet». Alle desse har «eldsjeler» som fortener heider for sitt oppofrande arbeid.

I saksframlegget frå kommunen er det stillt spørsmål om ein av prisane bør vera uttrykk for Alversamfunnet si høgaste utmerking.

Det er vidare vurdert 4 løysingar:

Alt. 1: Tre prisar – kulturpris, idrettspris og frivilligpris

Alt. 2: Overgripande kulturpris

Alt. 3: Ein felles pris for det utvida kulturomgrep

Alt 4: Kulturpris og frivilligpris

Framlegg til uttale: Alver idrettsråd vil rå til at det vert oppretta 4 prisar i Alver kommune:

- 1. Kulturprisen, 2. Frivilligprisen, 3. Kulturstipend, 4. Idrettsstipend**

Grunngjeving:

1. Kulturprisen

Kulturprisen skal vera Alver kommune si høgaste utmerking og ei anerkjenning for framifrå innsats innan kultur, idrett eller frivilligheit over lang tid.

Kulturprisen skal vera sett saman av ein diplom og eit kunstverk, fortrinnsvis av ein lokal kunstnar.

2. Frivilligprisen

Frivilligprisen skal vera ein pris for særleg frivillig innsats innan kultur, idrett, humanitært arbeid eller helse over fleire år. Prisen omfattar såleis frivillig innsats både innan og utanfor «det utvida kulturfeltet»

Frivilligprisen skal vera sett saman av ein diplom og eit pengebeløp.

3. Kulturstipend

Kulturstipendet skal vera ei påskjøning til utøvarar/ledere som i året har synt gode talent/resultat innan kultur, uansett sjanger.

Kulturstipendet skal vera sett saman av ein diplom og eit pengebeløp avgrensa til kr. 30.000,-. Det kan delast ut inntil 3 stipend årleg

4. Idrettsstipend

Idrettsstipend skal vera ei påskjøning for utøvarar/trener/leder/dommer som i året har synt gode talent/resultat innan idrett, uansett idrettsgrein .

Idrettsstipendet skal vera sett saman av ein diplom og eit pengebeløp avgrensa til kr. 30.000,-. Det delast ut inntil 3 stipend årleg.

For alle prisane/stipenda:

- Personar, lag og organisasjonar busett i og utanfor kommunen kan bli vurdert ved tildeling av prisane/stipenda
- Alle kan senda inn eit skriftleg, grunngjeve framlegg til kandidatar til prisane/stipenda.
- Kommunen kan sjølv komma med framlegg på kandidatar til prisane/stipenda

Idrettsrådet ser det som naturleg at rådet er representert i juryen for Kulturprisen, Frivilligprisen og for utdeling av idrettsstipend.

Vedtak: Alver idrettsråd sluttar seg samrøystes til framlegg til uttale